



**О‘ЗБЕКИСТОН RESPUBLIKASI XORAZM VILOYATI BOG‘OT
TUMANI HOKIMINING
QARORI**

Bog‘ot shaharchasi, O‘zbekiston ko‘chasi, 18-uy

2021 -yil 1 - mart

552 n -son

Bog‘ot shaharchasi

Ўзбекистон Республикаси Президентининг 2021 йил 5 мартда “Хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш чора-тадбирлари тўғрисида”ги ПҚ-5020-сонли ҳамда бу юзадан вилоят ҳокимининг 2021 йил 12 мартдаги 77қ-сонли қарорларининг ижросини таъминлаш тўғрисида

Туманда тадбиркорлик ташаббусларини янада қўллаб-қувватлаш, жойларда “Аёллар дафтари”ни шакллантириш ва унга киритилган хотин-қизлар муаммолари, эҳтиёжлари ва қизиқишларини тизимли ўрганиш, таҳлил қилиш ва ҳал этиш борасидаги ишларни сифат жиҳатдан янги босқичга олиб чиқиш мақсадида

Қарор қиламан:

1. Ўзбекистон Республикаси Президентининг 2021 йил 5 мартда “Хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш чора-тадбирлари тўғрисида”ги ПҚ-5020-сонли ҳамда бу юзадан вилоят ҳокимининг 2021 йил 12 мартдаги 77қ-сонли қарорлари раҳбарлик ва ижро учун қабул қилинсин.

2. Туман хотин-қизлар жамоатчилиқ Кенгаши (кейинги ўринларда-туман Кенгаши) 1-иловага мувофиқ ташкил этилсин. Қуйидагилар Кенгашнинг асосий вазифалари этиб белгилансин:

хотин-қизларнинг ижтимоий-сиёсий фаоллигини ошириш, уларни қўллаб-қувватлашга доир ислохатларнинг мазмун-моҳияти ва аҳамиятини аҳоли ўртасида кенг тарғиб қилиш;

хотин-қизларнинг таълим ва касбий кўникмалар олишлари, муносиб иш топишларига ҳар томонлама кўмаклашиш, тадбиркорлигини қўллаб-қувватлаш, иқтидорли ёш хотин-қизларни аниқлаш ва уларнинг қобилиятларини тўғри йўналтириш;

худудларда, айниқса, қишлоқларда хотин-қизларга кўрсатиладиган тиббий-ижтимоий хизматлар сифати, улар ўртасида соғлом турмуш тарзини таъминлаш борасидаги ишлар самарадорлигини ошириш;

турар жойга мухтож хотин-қизларни уй-жой билан таъминлаш, турмуш ва меҳнат шароитларини яхшилаш, даромадларини кўпайтириш борасида тизимли чора-тадбирларни белгилаш;

хотин-қизларнинг ҳуқуқлари ва қонуний манфаатларига дахлдор масалаларни чуқур таҳлил қилиш, илғор тажрибалар асосида мавжуд муаммоларни ҳал қилиш бўйича қонунчилик ва амалиётни такомиллаштириш юзасидан таклифлар ишлаб чиқиш;

хотин-қизларнинг оилаларни мустаҳкамлаш, миллий ва умуминсоний қадриятларни асраб-авайлаш ҳамда уларнинг фарзанд тарбиясидаги ролини ошириш чораларини кўриш;

хотин-қизлар жамоатчилиги Кенгашлари, маҳаллалардаги “Аёллар маслаҳат кенгашлари” фаолиятини мувофиқлаштириш, уларнинг давлат ва жамоат ташкилотлари билан самарали ҳамкорлигини таъминлаш, услубий-амалий кўмаклашиш;

“Аёллар дафтари” билан манзилли ишлаш, мутасадди ташкилотлар, секторлар томонидан хотин-қизларнинг муаммоларини ўз вақтида бартараф этилиши устидан жамоатчилиги назоратини амалга ошириш.

3. Туманда хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш бўйича чора-тадбирлар режаси 2-иловага мувофиқ тасдиқлансин.

4. Туман ҳокимининг биринчи ўринбосари (С.Қурбонов), туман молия бўлими (Ж.Рўзметов):

нотурар жойларда истиқомат қилаётган аёлларни уй-жой билан таъминлаш;

отасидан айрилган, ёлғиз онаси қарамоғида бўлган вояга етган уй-жойга мухтож хотин-қизларни уй-жой билан таъминлаш юзасидан маблағ ажратиш бўйича тегишли чораларни кўрсин.

2021 йилда “Аёллар дафтари”га киритилган хотин-қизларни қўллаб-қувватлаш жамғармаси ҳисобидан боқувчисини йўқотган, ногиронлиги бўлган ва ўзгалар парваришига мухтож хотин-қизларга бир марталик моддий ёрдам кўрсатилишини;

нотурар жойларда истиқомат қилаётган хотин-қизларга турар жой ижараси компенсациясининг тўланишини;

ҳар чоракда маҳаллий бюджет прогнозининг ортиқча бажарилган қисмининг камида 15 фоизини “Аёллар дафтари”га киритилган хотин-қизларни қўллаб-қувватлаш жамғармасига йўналтирилишини таъминласин.

5. Туман ҳокимининг ўринбосари, Маҳалла ва оилани қўллаб-қувватлаш бўлими (Э.Рўзметов) 43 та маҳалла фуқаролар йиғинлари раислари билан биргаликда 2021 йил 1 майга қадар маблағлар йўналтириладиган хотин-қизлар рўйхатини шакллантириб, тўловларни амалга ошириш чораларини кўрсин.

6. Туман ҳокимининг ўринбосари, Маҳалла ва оилани қўллаб-қувватлаш бўлими (Э.Рўзметов) Бандликка кўмаклашиш туман бўлими (Д.Бекчанов), туман “Ҳунарманд” уюшмаси бош мутахассиси (М.Жуманиёзова):

хотин-қизларни ҳунармандчиликка жалб этсин;

2021 йил мобайнида ҳар бир ҳудудда асосан хотин-қизлар фаолият

юритадиган ҳунармандчилик турларига ихтисослашган кластерлар фаолиятини тажриба сифатида жорий этсин;

ушбу кластерлар ҳунармандчилик маҳсулотлари учун хом-ашё етиштириш, уни қайта ишлаш ва сотиш фаолиятини қамраб олсин;

кластерлар устав капиталининг 50 фоизи тенг улушларида Хотин-қизларни қўллаб-қувватлаш давлат мақсадли жамғармаси ва Бандликка қўмаклашиш давлат жамғармаси, қолган 50 фоизи ҳунармандларнинг ўз маблағи ҳисобидан шакллантирсин.

7. Туман ҳокимининг ўринбосари, Маҳалла ва оилани қўллаб-қувватлаш бўлими (Э.Рўзметов), туман ички ишлар бўлими (А.Абдуллаев), адлия бўлими (Я.Болтаев) 2021 йил якунига қадар зўрлик ишлатишдан жабр кўрган шахсларни реабилитация қилиш ва мослаштириш ҳамда ўз жонига қасд қилишнинг олдини олиш марказлари фаолиятини самарали ташкил этиш чораларини кўрсин.

Бунда, бир ой муддатда барча ҳудудларда зўравонликка учраган хотин-қизларга ёрдам кўрсатиш бўйича биттадан намунавий марказлар ташкил қилсин.

8. Халқ депутатлари туман Кенгаши котибияти (М.Қурёзов) халқ депутатлари туман Кенгаши сессияларида мутасадди давлат органлари раҳбарларининг хотин-қизларни қўллаб-қувватлаш, уларга тадбиркорлик фаолиятини амалга оширишга қўмаклашиш, шунингдек, хотин-қизларнинг ҳуқуқлари ва қонуний манфаатларини ҳимоя қилиш борасида амалга оширилаётган ишлар бўйича ахборотларни эшитиб борсин.

9. Туман ҳокимининг ўринбосари, Маҳалла ва оилани қўллаб-қувватлаш бўлими (Э.Рўзметов), туман ҳокимининг хотин-қизлар масалалари бўйича маслаҳатчиси (М.Матмуратова) хотин-қизларни қўллаб-қувватлаш мақсадида фан, санъат, адабиёт, ишлаб чиқариш соҳаси ҳамда давлат ва жамият фаолиятининг бошқа тармоқларида катта амалий тажрибага эга бўлган ҳамда алоҳида хизмат кўрсатган энг обрўли фуқаролар билан доимий равишда учрашувлар ташкил этиб борсин.

10. Вилоят ҳокимининг 2020 йил 19 августдаги 122-Қ-сонли қарори иловаси ўз кучини йўқотгани маълумот учун қабул қилинсин.

11. Мазкур қарорнинг ижросини назорат қилиш туман ҳокимининг ўринбосари, Маҳалла ва оилани қўллаб-қувватлаш бўлими бошлиғи Э.Рўзметов зиммасига юклатилсин.

Боғот тумани ҳокими



Ш.Яхшибаев